

Da quandu u mondu hè mondu

Erani passati i mesi da quandu u ziteddu avia scupartu stu locu è incontratu à IVAN. Com'è ogni sera s'era accucculatu sottu à a parti principali di l'urdinatori ch'è riscaldaia l'aria intornu à idda. Sta pustura 'ddi ramintaia i notti passati drintu à l'arburi carabunati circhendu d'arripusassi à l'ascosu.

Quantu tempu era passatu da quandu s'era lacatu u gruppu ? Di manera precisa ùn a sapia micca. A 'dd'avia amparatu IVAN à fà u contu di i ghjorni, di i settimane è di i mesi ma in daretu ùn ci pudia vultà, sapia solu ch'idd'era fughjitu mentri a staghjoni calda è ch'idd'erani passati avali i tempi nivosi. Sicondu à l'urdinatori vulia di ch'è a Tarra avia fattu guasgi un mezu ghjiru intornu à l'astru Soli. Ma tutti sti nuzioni staghjiani barba pà u so ciarbeddu.

Era firmatu ghjurnati sani à fassi cuntà a storia di l'Umanità da l'intelligjenza artificiali ch'era u so novu cumpagnu. Ùn era mai saziu u ziteddu. S'idd'ùn era ghjustappuntu pà andà à circa qualch'è robba da manghjà, ùn piantaia mai i so dumandi, è IVAN ùn si faticaia mai d'arrisponda, com'è sì, anch'iddu, dopu à più di dui seculi d'aspittera si gudìa di pudè, infini, tramandà tutti i so cunniscenzi.

Quantu ni sapia st'essaru guasgi divinu. U ziteddu ùn ci pudia sempri creda avali ch'è l'Anziani, i so antenati, erani stati capaci d'invintà una mascina para. E più ni spiigaia è più u ziteddu era cunvintu ch'è tuttu u sapè di U Vechju, tutti l'arreboli ch'iddu cuntaia à u gruppu addunitu intornu à iddu tandu impauritu è tandu amaraculatu ùn erani chè scimità.

U so nomu veru era Wul ma, trà iddi, u chjamaiani U Vechju, com'è s'idd'era sempri statu quì, tali ch'iddu si prisintaia, da quandu u mondu era mondu. È quand'hè nata sta criatura chjara com'è a nivu ci hà vistu un segnu divinu. Da quandu si pudia ramintà qualcosa u ziteddu, staghjia sempri chjosu in sta spezia di carciara sottu tarra. Da a vita di fora ùn sintia chè i soni ch'è viaghjaiani cù u lumu attraversu à u tafonu ch'è si truvava insù. Di tantu in tantu un odori ghjunghjia à circa u so nasu ma nudda di più.

Ùn era chè u Vechju à visitallu. È 'ddi spiigaia ch'idd'era mandatu da i dii, quiddi ch'è staghjiani annantu à a muntagna maiori dundi u soli vinia à rinascia ugni ghjornu è dundi u mondu finia. Ùn pudia escia di a so prighjò chè pà i festi o quandu si cilibraia à qualch'è miraculu, guasgi sempri u fattu di Wul. È ancu quì c'erani i reguli, nisun'ùn avia u dirittu di parlalli è a vulintà di U Vechju era sempri rispittata. U ziteddu era troppu priziosu, ma a 'ddi dicia, quand'avaria raghjuntu l'età, 'ddi mandaria i più beddi donni à falli scopra i piaceri suprani.

Ed hè cussì chì, abbastanza maiori, una sera di festa, era ruscitu à fughjasini u ziteddu. S'era missu in capu di truvà i so antenati divini in a cima di sta muntagna. Ma monti 'dd'era tucatu à francanni tantu è di diu ùn avia trovu. Finch'iddu ghjunghjissi in quidda cità. Quali, fora di qualchì essaru supranu, avaria pussutu custruiscia tali opara ? Tandu, vidindu st'arghjata maiori quantu certi piaghji ch'idd'avìa dighjà francati, u ziteddu pinseti d'essa ghjuntu in paesu divinu. Ùn truveti mai à nimu. Ùn c'era bisognu d'essa struitu tantu pà capiscia chì a vita, quidda ch'avaria pudutu essa accolta da quiddu locu, avia tralasciatu sta seguita di bastimenti sfraiati da un tempu ch'iddu ùn si pudia micca raprisintà. Cunquesta da a vita salvatica, a cità si lacaia dumà ugni ghjornu un pocu di più.

IVAN avia parlatu di a ghjenti ch'avìa campatu quì seculi fà. 'dd'avìa spiigatu chì erani sti simboli strani chì spuntaiani in certi lochi. A scrittura, firmà par sempri un dettu, in u gruppu nisun'ùn ci avia mancu pinsatu. È tandu u ziteddu si sintia a parità cù U Vechju è i so ghjuveddi fatti d'ossi. L'avìa sugnatu parichji volti è quandu ghjunghjia cù i so incanti ùn calaia l'ochji è 'ddi musciaia i so carti scritti. Tutti st'annati à trimulà di front' à iddu s'erani sguassati com'è lampati in a fumara. A notti passata, pà a prima volta, l'avìa ancu tumbu.

Capia u ziteddu chì quiddu chì t'hà a cunniscenza ùn si doma micca. Allora un ghjornu dissi à IVAN ch'iddu vulia amparà tuttu ciò chì si pudia sapè, ùn vulia lacà nudda parch'idd'ùn ghjunghjissi mai qualchissia à supranallu. Cù a so boci metallica l'urinatori li risposi ch'ùn isistia nimu in u mondu cunnisciutu chì sapia tuttu.

-Mancu tù ?

-Manch'eu. T'aghju in mimoria tutta a cunniscenza di l'omini prima ch'idda si sfundessi a civilisazioni ma quantu ni firmaia a sopra.

-Hai dittu u mondu cunnisciutu ? Voli dè chì ci sariani altri mondi ?

-Iè, a noscia piazza in l'universu ùn sapemu ancu qualiss'hè, è sicuramente ch'ùn a sapemu mai.

È tandu IVAN 'ddi cunteti u sognu di l'Anziani, st'ussissioni di circa di sapè s'iddi c'erani altri populi ind'è l'immensità di u bughju cutratu di l'universu. Tanti volti aviani cridutu di truvà u mezu d'arrisponda è sempri aviani fiascatu.

Ùn era firmatu ch'à mandà spluradori, ghjenti pronti à lacassi tuttu finu à u so mondu senza mancu a spiranza di vultà un ghjornu, com'è in i tempi passati quandu, millai d'anni fà, i populi di l'oceanu Pacificu partiani in circa di tarri novi ind'è l'immensità turchina. Da u principiu di a razza finu à stu ziteddu era stata sta vulintà di vulè sempri andà un pocu più luntanu ch'avìa fattu di l'omu ciò ch'idd'era, pà u meddu ma ancu pà u pughju.

IVAN dissi à u ziteddu di chì manera aviani custruitu sti cità di u spaziu in celi, u tempu ch'era statu nicissariu, i criatori ùn i vidariani mai pronti à viaghjà com'è l'architetti di sti catidrali medievals.

Prima ammaraculatu da sti racconti, u ziteddu finì pà ranghjalli in un scornu di a so mimoria, ramintendusili quandu, fighjulendu u celu di notti, si smaraviddaia di sapè sì , intornu à qualchi stedda, una culunia umana criscia.

Ghjinsi un ghjornu dundi IVAN annunceti una trasmissione :

-A Tarra, quì hè a missione ENKIDU 146 versu Trappist 1b. Simu in avvicinanza di a pianetta chì presenta segni di civilizazioni avanzata...